

Betico Croes

Politica ta e arte di logra planea i ehecuta destino di un pueblo di acuerdo cu e interes di cada politico independientemente si su punto di bista por ta bon of malu pa otronan.

Ser un politico no ta algu facil. Hopi ta esnan cu ta kere cu e echo cu nan ta pertenece na un partido politico of organisacion politico, ta hasi nan politico de facto. Politica ta exige na prome luga un conocimiento profundo di e realidad riba cual e ta ser delinea i tambe e curashi pa logra ehecuta e deseonan cu ta biba den cada ken.

Si tin un merito cu ta pertenece na Betico Croes ta esun di a sa di hasi politica den e terminonan sano di palabra. Betico Croes a sa di a duna politica na Antiyas un rumbo dinamico i fuerte kibrando cu tur e structuranan tradicional di accion politico. No mester lubida cu e prome obhetivo di un politico ta conkista di poder. Betico den su lucha pa conkista poder a lansa un estrategia dobbel cu a consisti di ademas di asumi e realidad di poder, trata na cambia su estructura di un forma claro i obhetivo. Un combinacion di caracter fuerte, consecuencia, seriedad i capacidad a converti e desaparecido den un figura historico sin precedente. Un homber cu a pone su dilanti e autonomia di Aruba i a lucha pa logra esaki. E satisfaccion principal di un politico ta e logro di su obhetivonan independientemente cu e logro aki ta of a ser disfruta pa otronan cu kisas ta un lift nan a hanya. Na momentu cu historia describi e realidad arubano den tur su intensidad i extension, e lo percura pone Betico Croes na cabes. Status Aparte di Aruba ta sinonimo di Betico Croes i viceversa. .

Pueblo arubano por ta orguyoso cu siendo un isla chikitu a sa di produci un figura manera Betico. Un figura historico respeta pa tur bon conocedor di politica, un figura practicamente envidiabel cu den su momentunan di mas tension tabata afirma cu "en el camino se endereza la carga".

Nos a conoce Betico, nos a papia cune na varios oportunidad i e chispa di revolucionario cu nunca ta acepta e realidad cu e ta biba aden tabata signa su actitud. Un homber serio, capaz cu no tabata duda den ningun desicion, un homber cu a a converti su mes den e actor principal di e teatro politico antiyano. Un homber cu a pone hulandesnan bai scol di politica bek bai studia i analisa. Un homber cu a percura di lanta deseonan biew di arubanonan i converti nan den realidad. Aruba ta di luto, Antiyas completo ta di luto i mi mes persona ta di luto. Ki dolor un hende consiente ta sinti ora un pais perde un figura asina importante den e dificil situacion cu Aruba ta atravesando. Ki dolor mi pueblo ta sinti ora e corda cu Betico no tey mas. Pero ta keda e aliento cu figuranan manera Betico no ta muri hamas.

Figuranan manera Betico no por disparece pasombra historia no ta permiti esaki. Mi amigu, pa ami bo no a muri, semper lo bo tey. DIOS lo sa di tuma bo den su reino i na bo descanso eterno. Algun dia nos lo topa pa nos recorda mundu, pa nos recorda e skopnan cu bo ta hanya i e contratiemponan cu bo ta encontra ora bo lucha pa husticia i bienestar di pueblo. DIOS sa kiko e ta hasi. Mundu ta mu-chu chiki pabo i DIOS a tumabo den su reino pa for di aya bo goberna pa eternidad. Paz na su restunan.

NELSON PIERRE.